

Rendemos neste exemplar unha homenaxe aos náufragos do barco do Gran Sol Arosa, un buque de bandeira británica pero con base en Marín.

O suceso aconteceu na madrugada do martes 3 de outubro do 2000, cando o barco encallaba na rocha de Doonguddle, na costa oeste de Irlanda, preto da entrada da baía de Galway, onde pretendía refuxiarse fuxindo do temporal. Sabíase entónces que case todos os tripulantes eran galegos, áinda que non se coñecía nin a identidade nin a nacionalidade dos falecidos. O único supervivente foi o máis novo da tripulación, de 24 anos e natural de Marín.

Sobre os desaparecidos, os gardacostas irlandeses mantiñan poucas esperanzas de os atopar con vida pola baixa temperatura das augas e polas malas condicións meteorolóxicas, con ventos de forza 7-8 procedentes do S-SW, mar moi axitada con ondas de 5 metros, chuvia e mala visibilidade. Con alerta de ventos

huracanados na súa zoa de pesca. Hai constancia da chamada de socorro cando encallaron na latitude 53° 15' 21"N e lonxitude 9° 59' 42"W.



O dia 4 de outubro as autoridades irlandesas deron a coñecer na tarde do mércores as identidades das cinco persoas que morreron no naufraxio do barco "galego" "Arosa". Tratábase de Ramón Pardo Juncal, 31 anos, patrón de pesca e residente en Bueu; Eugenio Díaz Carracelas, 43 anos patrón de costa, de Marín; José Ramón García Figueroa cociñeiro, de Cangas; o contramestre Julian Soto Fuentes de Marín; e un mariñeiro de Lousame (A Coruña).

A identificación foi posible grazas ao único supervivente.

Os sete desaparecidos eran: Francisco Filgueira Fernández con 35 anos, natural de Marín; Alfredo Estévez García con 32 anos, de Bueu; Luis Miguel Vidal Ribadulla, de 26 anos, residente en Pontevedra; Jesús Lafuente Chazo, de 31 anos, de Pontecesures; Albertino Herculiano Dacosta Craviz, tamén tiña 35 anos, Sebastián Vaz de Almeida, con 31 anos, ambos os dous de San Tomé de Piñeiro; Orlando Soares de 28 anos e natural de Gana.

Hoxe pódese ver a escultura de pedra que fica como homenaxe a estes náufragos, situada na entrada do recinto da Confraría de Bueu e que mostramos na foto. Dende aquí o noso recordo a tanta xuventude truncada.



Detalle do monumento a carón da Lonxa de Bueu